


Augustus 1936.

No. 23.

Taon ka 3.



# SAM KAUW GWAT PG

Orgaan dari Batavia Buddhist Association, Sam Kauw Hwe Batavia  
Menado dan Telokbetong.

ARTIKEL SPECIAAL DALEMINI NUMMER:

Gandjaran dan Pembalesannja Kowma. — Lezing dari Sienshe Lin Feng Fei, pendita kepala dari Kwan Im Tong.

Mentjari Katentreman Hidoep. — Lezing dari Toeau Kwee Tek Hoaij.

Lezing-lezing dari Toeau-toean Thio Boen Siat dan The Soen Tiling dan Mej Sie Lian Kwie.

## Kabar Administratie.

Dengen membilang banjak trima kasih kita soedah  
trima kiriman oewang boeat membajar abonnement  
Sam Kauw Owat Po dari toean-toean jang terseboet  
di bawah ini:

Ong Hong Ing dan Tan Biauw Kie à f 1,50.

Tan Soen Djie, Mevr. T. H. Njo, Lo Ban Siong dan  
Tjia Tek Boen à f 0,75.

Pembajaran di atas jaitoe jang ditrima sampe 10 Juli  
1936.

Pembajaran jang dirangkep dengen *Moestika Dharma* atawa *Moestika Romans* ada dimaloemken  
dalem itoe masing-masing maandblad sendiri. Pembajaran jang ditagi dengen postkwitantie, agent atawa  
rekening looper, tida dimaloemken.

---

## Kapentingan Orang Prampoean.

ILMOE KATJANTIKAN, jang haroes diampoe-  
njai oleh sasoeatoe orang prampoean jang hen-  
dak rawat diri soepaja tinggal moeda, tjantik,  
seger dan sehat. Ini boekoe ada penoeh dengen  
roepa-roepa recept jaang gampang dan orang bisa  
bikin sendiri boeat mendjaga badannja soepaja  
tinggal tjantik, antaranja bagimana moesti bikin  
bedak, cold-cream, zalf moeka, obat ramboet,  
minjak ramboet, enz. enz. . . . . f 2,00

ILMOE BIKIN KOEWE, berisi ratoesan recept  
dari segala matjem koewe, seperti koewe basah  
tjara Betawi, koewe Olanda, Fransch, Spanje,  
Duitsch, Amerikaan, djoega ada recept boeat  
bikin atjar, kembang góela, bischuit enz. Pendék-  
nya ini boekoe hardes diafpoenjai oleh sasoeatoe  
orang prampoean jang radjin boeat tambahken  
pengataoeannja . . . . . f 2,00


BOEKHANDEL „MOESTIKA“  
Tji joeroeg (Preanger)

# Kasoedjoetannja kaoem Budhist Tionghoa pada Pengataoean batin di djeman doeloe.

Sekarang sabagian besar dari bangsa Tionghoa, apalagi di Indonesia, tida begitoe perhatiken pada agama. Tetapi di djeman doeloe ada banjak pendita-pendita Buddhist Tionghoa jang begitoe giat aken mentjari pengartian batin hingga bersedia aken hadepken bahaja dan kasangsaraän boeat bikin perdjalanan ka Hindustan jang begitoe djaoe dan soeker tjoemah soepaja bisa fahamken dan salin kitab-kitab peladjaran Buddha jang aseli.

Lebih doeloe dari I Tsing, jang riwajat perdjalanan-nya soedah didjadiken boekoe, ada pendita Fa Hsien, jang di taon 399 soedah brangkat dengen djalan darat dari Tiongkok ka Hindustan dan balikna ambil djalan laoet, dengen mampir di Ceylon dan Sumatra, dan baroe bisa balik ka Tiongkok di taon 414, jaitoe 15 taon berselang.

Fa Hsien terlahir di provincie Shansi, dan iapoenna nama familie (She) Kung (Khong). Ia tinggalken kota kalahirannja dan pergi ka Chang-an (Tiang An, sekarang Hsi-an Fu) jang pada itoe djeman ada djadi ibokota dari Tiongkok, dengen maksoed aken fahamken Buddhisme. Tetapi koetika mendapat liat kitab-kitab jang tersedia tida tjoekoep djoemblahnja, maka dengen bebrapa kawan ia bikin perdjalanan ka Hindustan soepaja bisa dapet batja kitab-kitab soetji Buddhist salengkep-lengkepnja. Dengan membawa sadjoemblah besar kitab-kitab ia telah balik ka Tiongkok dan diam di Nanking, dinama ia liwatken sisa dari kahidoeppanja aken menjalin itoe kitab-kitab ka dalem bahasa Tionghoa, dan ia meninggal dalem oesia 85 taon. Iapoenna penoetoeran dalem saboeah kitab jang dinamaken „Fo Kuo Chi“ atas apa jang ia saksiken dalem perdjalannanja, telah disalin ka dalem berbagi-bagi bahasa Barat.



Gambar jang dimoeat disini ada meloekisken koe-tika Fa Hsien, bersama tiga kawannja, dateng tengok bekas astananja Radja Asoka di Pataliputra (Patna), astana mana, maskipoen soedah banjak roesak dan beroepa reroeboehan, tembok-temboknya jang penoeh oekiran masih berdiri. Tentang ini astana Fa Hsien soedah bikin penoetoeran lengkep dalem boekoenja itoe.

Penoetoerannja tentang ka'ada'an di Sumatra dan bebrapa poelo laen di Indonesia jang ia koendjoengin dalem peladjaran balik dari Hindustan ka Tiongkok, ada dihargaken tinggi oleh orang-orang jang ingin tjari taoe ka'ada'an agama dan penghidoepannya pendoedoek di Sumatra dan Java pada permoela'an abad kalima sasoedahnja Kristus, jang tida bisa kataoean sama sekalih kerna tida ada penoetoeran jang boleh dipertijaja katjoeali jang dibikin oleh orang-orang pelantjongan Tionghoa.

# Sam Kauw Gwat Po.

三 教 月 報

ORGAN DARI BATAVIA BUDDHIST ASSOCIATION,  
SAM KAUW HWE BATAVIA, MENADO  
DAN TELOKBETONG.

ISINJA INI MAANDBLAD ADA DIOEROES DAN DITANG-  
GOENG OLEH REDACTIE „MOESTIKA DHARMA.”

Harga abonnement per kwartaal f 0,75 Pembajaran dimoeka  
Kaloe berlangganan dirangkеп sama Moestika Dharma atau  
Moestika Romans, boeat ini maandblad tjoemah tambah per  
kwartaal f 0,50. Harga advertentie boleh berdami.

Kantoor Redactie Administratie : Tjitjoeroeg, Preanger.

## Apatah betoel Sam Kauw Hwe satoe pakoempoelan „Gado-gado?”

Khong Tjoe telah letakken djabatannja sabagi Hakim Besar boekan dari perboeatannja rahajat golongan rendah dan bodo, hanja lantaran djeloesnya negri Tjee, jang merasa koeatir pada negri Louw poenja kamadjoean di bawah pimpinan itoe orang boediman. Dan koetika Khong Tjoe mengider tigabelas taon lamanja dengen tida ada satoe radja jang maoe djalanken iapoenna atoeran boeat menjelameitken rahajat, itoelah boekan sadja dari kabodoannja itoe radja-radja, hanja teroetama lantaran banjak mantri-mantri jang terpeladjar dan berpengaroeh besar telah mengasoet boeat djangan pakerdjaken pada Khong Tjoe, saking sirik dan djeloesnya pada itoe Goeroe boediman jang djoedjoer dan pande.

Jang menjilakaken Jesus djoega boekan golongan orang bodo dan tida terpeladjar, hanja madjelis agama Jahoedi jang dipimpin oleh Pendita Besar Caiaphas,

Jang ampir membinasaken Nabi Mohammad poen boekan kaoem biadab, hanja kepala-kepala jang berpengaroeh besar di Mekkah antara mana ada djoega jang perna sanak, jang diam-diam atoer komplotan aken ambil djiwanja itoe Nabi.

Mengapatah itoe orang-orang jang moestinja lebih mengarti dan lebih bisa menghargain pada peladjaran baek, djoestroe menentangin dengen keras pergerakanja Nabi-nabi dan orang-orang boediman jang menjelametken manoesia ?

Inilah tida dari laen lantaran, hanja kerna marika merasa koeatir nanti terdesek ka belakang kapan ada moentjoel gerakan jang lebih baek dan lebih disoeka oleh orang banjak dari-pada apa jang marika mampoeah kerdjaken.

Rasa djeloes, sirik dan dengki, membuat iaorang bentji dan moesoehin mati-matiyan pada sasoeatoe orang jang bisa berboeat apa-apa melebihi dari kamampoean marika. Aken djaga djangan sampe sinar pelitanja sendiri mendjadi kaliatan goerem lantaran laen orang mempoenjai penerangan lebih sampoerna, maka marika tida bersangsi aken lakoeken segala matjem perboeatan doerhaka, dan biar poen doenia djadi *kiamat* marika tida nanti gampang maoe akkoe kabeneran dan kabaikan jang dikerdjaken oleh laen orang jang tida soeka mengèkor padanja.

Ini sikep ketjiwa sabagian ada dari lantaran itoe achli-achli agama jang koekoeh dan kepala batoe, otaknya soedah terdjedjel terlaloe padet sama sikep membenerken diri sendiri, hingga tida ada tempat lagi boeat memikir dan menimbang sifat kabeneran jang berbeda dari marika poenja anggepan dan pendapatan, jang lantaran soedah karatan atawa berkarang, djadi terlaloe soesah boeat digerakin ka laen djoeroesan jang lebih baek dan lebih sampoerna.

Boeat benerken perboeatanja sendiri, maka ia-

orang moelai pikirin tjara bagimana moesti tjetelah dan rendahken gerakan laen jang tida tjetjok dengen kakaoekohannja. Dalem hal ini itoe achli-achli kabatinan bisa merosot begitoe rendah hingga sering-kalih madjoeken tjingli jang seperti anak-anak, atawa goenaken fitenahan begitoe djidji seperti jang tjoemah bisa kaloebar dari moeloetnja orang-orang jang paling boesoek.

Begitoealah djahatnja hawa nafsoe kadengkian!

Paling belakang ini ada moentjoel omongan bahoea Sam Kauw Hwe ada satoe gerakan jang tida katen-toean djoentroengannja, tjampoer adoek seperti gado-gado, lantaran menjiarken peladjaran dari tiga matjem agama. Orang jang bitjara begitoe, ada anggep bahoea peladjaran jang bersih tjoemah moesti dari *satoe* agama sadja.

Diliat saklebatan itoe alesan ada djoega benernja. Boekankah Gredja Kristen tjoemah siarken peladjaran dari Jesus Kristus? Boekankah dalem masdjit atawa langgar orang tjoemah perhatiken peladjaran dari Nabi Mohammad?

Tapi kapan diliat kemampoeannjaitoe orang-orang jang mengakoe tjcemah maoe perhatiken SATOE agama sadja, lantes ternjata jang kaloe marika begitoe setia pada Buddhisme atawa poen Taoisme boekan lantaran taoe dengen pasti itoe agama atawa peladjaran soedah tjoekoep baek dan sampoerna, hanja teroeta-ma kerna iaorang TIDA TAOE peladjaran Khong Kauw, atawa poen *sabaliknja*. Djadinja sekalihpoen maoe bitjaraken peladjaran laen, iaorang tida mam-poeh, lantaran TIDA BETJOES, atawa pengataoeannja ada begitoe rendah hingga tida brani ditondjolin ka moeka oemoem. Kasoedahannja iaorang mengotje ka sama simi atas tida perloenza menjiarken lebih dari SATOE peladjaran, jaitoe dari sebab pengartianinja sendiri tjoemah saroepa. Djadinja aken toetoepin

kabodoannja sendiri, marika kapingin orang djangan perhatiken peladjaran laen dari-pada apa jang iaorang mengarti.

Ini matjem katjoepetan boekan sadja meroegiken dirinja sendiri, hanja menjesetken djoega pada orang banjak jang pertjaja pada marika poenja asoetan, Gerakan Sam Kauw poenja kamadjoean tida nanti bisa ditjegah, sebab berdasar atas kabeneran.

Kabeneran jang dipegang tegoeh oleh Sam Kauw Hwe adalah beroepa itoe boekti-boekti, bahoea Nabi-nabi atawa Goeroe-goeroe Doenia jang siarken Peladjaran Besar tida semoeanja bertelorin sendiri itoe peladjaran dari pikirannja, hanja selaloe dengen djalan mengoempol dan meratjik dari berbagi-bagi agama dan peladjaran jang soedah ada lebih doeloe. Oepamanja Buddha, sabelonnja siarken itoe Dharma lebih doeloe soedah mengider ka mana-mana tempat aken denger pengadjaran dan katerangannja goeroe-goeroe jang faham kabatinan tentang berbagi-bagi soeal agama jang soelit. Itoe peladjaran tentang Karima dan Reincarnatie, Buddha dapet petik dari agama Hindoe, dan sabagian lagi ada berdasar dari Agama Djain, jang disiarken oleh Lord Mahawira. Djadinja Buddha tjomah robah dan perbaiki apa jang soedah ada, dan koempoel peladjaran dari bebrapa agama menoeroet djalannja perobahan djeman.

Tentang Khong Tjoe orang semoea soedah taoe bagimana ia telah koendjoengin Loo Tjoe aken tanja peladjaran, dan malah Dr. Hu Shi bilang Khong Tjoe ada „moerid“ dari Loo Tjoe, sedeng bebrapa bagian dari peladjaran Khong Tjoe tida bisa disangkal lagi ada dipengaroehin oleh Taosime. Djoega apa jang Khong Tjoe siarken, dan terkenal sabagi Khong Kauw atawa „Peladjarannja Khong Tjoe“, kabanjakan ada berdasar atas peladjaran dari Radja-radja Boediman di djeman koeno, ratoesan atawa riboean taon di

moeka Khong Tjoe terlahir, Itoe segala peladjaran jang moentjoel dalem berbagi-bagi djeman, dari Oeij Tee sampe Tjoe Boen Ong, telah dikoempoel, dipetik dan disaring oleh Khong Tjoe, jang dengan begitoe peladjarannja ada terdiri dari *banjak tjampoenan*. Tapi toch kaoem Taoist tida haroes bilang, peladjaran Khong Kauw ada samatjem peladjaran „Tjap-tjay.“

Loo Tjoe sendiri poenja peladjaran soedah terang boekan ia jang lahirken, hanja ada satoe koempoelan dari peladjaran jang soedah terkenal dij nastie Hee dan Siang, lebih doeloe dari Tjoe Tiauw. Lama sabelonnja Loo Tjoe moentjoel di doenia itoe peladjaran Taoisme soedah tersiar di Tiongkok, dan antara orang-orang jang terkenal pande dalem Taoisme ada teritoeng djoega Kiang Thay Kong (Kiang Tjoe Ge) ferdana mantri dari Baginda Boen Ong !

Dan apatah itoe jang dinamain Kristen ? Tida laen dari samboengannja Judaisme atawa agama Jahoedi, seperti jang terdapat dalem Bybel Perdjandjian Lama. Dan dongeng-dongeng jang berhoeboeng dengan kalahirannja Jesus soedah terkenal di Hindustan riboean taon di moeka Jesus terlahir, jaitoe dalem tjerita dari penghidoepannja Sri Krishna, hingga timboel sangka'an orang Kristen soedah pindjem itoe dongengan dari Hindustan. Dan kaloe dipreksa lagi soembernya agama Jahoedi, orang bisa dapet liat beberapa sifat jang sama dengan agamanja bangsa Chaldean dan laen-laen pendoedoek dari Asia Ketjil dan Messopotamia, dan malah terdapat djoega kapertjaja-an dari bangsa Egypte koeno.

Tentang peladjarannja Nabi Mohammad, barang siapa membatja artikel „Agama Islam“ jang sekarang lagi dimoear dalem *Moesstika Dharmo*, nanti insjaf bahoea soember dari ini agama ada beratsal dari kapertjaja-anja pendoedoek di Arabia sendiri jang me-

njembah berhala, dari agama Jahoedi, agama Kristen dan dari peladjarannja Zoroaster — tida koerang dari *ampat agama* atawa kapertjaja'an jang soedah ada lebih doeloe dari terlahirnja Nabi Mohammad. Tapi toch tida ada saorang jang begitoe gendeng aken namaken Agama Islam sabagi „gado-gado.“

Terhadep peladjaran jang baroe moentjoel belon brapa lama, kita maoe oendjoek sadja peladjaran Theosofie, jang baroe mendjalar dalem roepa seperti sekarang pada anempoeloeh taon laloe. Dalem itoe peladjaran ada terkoempoel sari dari *semoea agama*, baek jang masih berlakoe atawa jang soedah linjap dan tida terkenal lagi.

Peladjaran dari Krishnamurti, jang baroe moentjoel belon sapoeloeh taon laloe, kapan diselidiki ternjata ada tjampoeran dari Wedanta, Taoisme dan Budhisme!

Orang-orang Kristen jang berpengataoean loeas sekarang tida merasa kaberatan kapan pendita-penditanya membitjaraken djoega peladjaran Khong Tjoe, Loo Tjoe atawa Buddha. Ini soedah bebrapa kalih dilakoeken oleh Pendita Oei Soei Tiong di Djawa Wetan, sedeng di Batavia ada Pastoor Sterneberg jang tida brentinja bitjaraken Taoisme, dan taon jang laloe Pendita de Groot telah bitjaraken Khong Tjoe dalem Gredja Besar di Batavia-Centrum.

Maka kaloe sekarang ada saorang Buddhist atawa pendekar Too Kauw tjelah pada Sam Kauw Hwe, lantaran oetamaken Tiga Agama, itoelah moesti dari salah-satoe sebab : saking dengki atawa saking tjoepetnya.

Kita rasa lebih banjak dari lantaran dengki, kerna koeatir marika poenja gerakan sendiri lama-lama terdorong ka samping. Tentang katjoepetan, kita tida pertjaja ada saorang Tionghoa begitoe poenja tjoepet hingga tida dapet taoe, hahoea sabagian besar dari orang jang masih pegang tetep „Agama

Tionghoa", dalem pracktijk ada memelok *Sam Kauw*, kerna ini Tiga Agama sadari banjak abad jang laloe soedah *tergaboeng* mendjadi satoe dalem *batin* dan *penghidoepan* bangsa Tionghoa.

Kita sendiri anggep tida djelek, malah lebih baek, kaloe satoe Hoed Kauw Hwe meloeloe perhatiken agama Buddha, dan satoe Khong Kauw Hwe tida bitjaraken laen dari Agama Khong Tjoe, soepaja itoe gerakan jang masih belon madjoe tida mendjadi limboeng dan menjimpang dari toedjoean. Tetapi iaorang tida haroes menjelah pada Sam Kauw Hwe tjoemah lantaran ini pakoempoelan soedah perhatiken sari dari Tiga Agama jang soedah *tergaboeng* dalem *batin* dari penghidoepan Tionghoa. Sam Kauw Hwe ada pandang seperti soedara, dan ingin bekerdja sama-sama dengen sasoeataoe pakoempoelan atawa pergerakan jang perhatiken sadja salah-satoe dari itoe Tiga Agama sendirian. Djoega kita tida ingin bermoe-soeh pada laen-laen agama jang boekan Sam Kauw kaloe di laen fihak tida ada disiarken apa-apa jang bersifat menjerang atawa merendahken pada Khong Kauw, Hoed Kauw dan Too Kauw. Doenia ada tjoekoep lebar aken masing-masing agama bekerdja dalem kalangannja sendiri.

---

## Gandjaran dan Pembalesannja Karma.

*Lezing dari Sienshe Lin Feng Fei, Hweshio kepada dari Kwan Im Tong, dibatjaken dan diterangken maksoednya oleh Toean Kwee Tek Hoaij, dalem pertemoean dari Batavia Buddhist Association tanggal 21 Mei 1936.*

Di dalem sasoeatoe hal, kapan ada sebab atawa permoela'an, tentoe moesti djoega ada achirnja. Manoesia poenja perboeatan ada seperti bibit jang aken melahirken boeah atawa woedjoed dan kadjadiannja. Pendeknja itoe tenaga jang terbit dari sasoeatoe perboeatan selaloe kasih oendjoek roepa atawa hatsilnja, dengen djalan langsoeng atawa poen tida langsoeng (indirect).

Sabaliknja djikaloe tida ada sebab-sebab jang menjadi lantaran, pastilah tida aken moentjoel apa-apa jang mendjadi boeah.

Apa jang sekarang hendak ditoetoerken jaitoelah sakedar aken kasih oendjoek dengen tjara jang sa-derhana tentang gandjaran atawa pembalesan jang manoesia bisa dapet dari sasoeatoe perboeatannja-jang baek atawa poen djahat, radjin atawa males, jang sadari banjak djaman-djaman laloe sampe sekarang adá djadi bibit beroepa Karma jang boehnja marika aken trima; tegesnya bagimana nasif jang manoesia dapet sekarang, jang soedah moentjoel atawa poen masih mengérêm, itoe semoea ada hat-sil atawa gandoelan dari perboeatan dalem kahidoep, an jang laloe.

Itoe hatsil dari Karma baek jang biasa ditrima oleh manoesia ada terbagi djadi toedjoeh djenis, kerna kita poenja Hoed (Buddha) maoe soepaja orang teroesken pakerdja'an jang baek, djangan ditinggal atawa disia-siaken satengah djalan, soepaja pahalanja senantiasa djadi semingkin tinggi dan besar, hingga

bisa sampeken itoe katentreman dari Nirwana.

Itoe Toedjoeh gandjaran jang tersedia di doenia ada begini sifatnya :

- I. Ridlah atawa koernia.
- II. Trima boedi pembalesan baek.
- III. Bisa bergaoelan dengen orang-orang boediman.
- IV. Berkah dari perboeatan baek jang menambahken kaslametan.
- V. Mempoenjai imbangan sama-rata dalem segala hal.
- VI. Lantes bisa petik boeah dari kabaekan.
- VII. Terbebas dari Karma, hingga terlolos dari kalahiran dan kamatian.

Di bawah ini ada keterangan lebih loeas dari itoe toedjoeh gandjaran.

I.

*Ridlah atawa Koernia.*

Itoe Karma baek dari tempo doeloe membikin saorang tani, oepamanja, poenja sawah atawa kebon selaloe soeboer, tetanemannja bagoes, hal mana ada dipandang satoe kaberkahan jang dateng dari Toehan, jaitoe dari Karmanja jang baek, kerna boeat dapet itoe kaberkahan ia tida oesah trima boedi atawa pertoeloengan dari laen orang, hingga tida aken timboel bangkitan di belakang kalih.

Dalem ini hal ada terdapat doea sebab : langsoeng dan tida langsoeng. Jang dibilang „langsoeng“ adalah kerna itoe kaberkahan dateng dari hatsilnja perboeatan dari itoe orang tani sendiri jang soedah tjiptaken Karma baek bagi dirinja dalem penghidoepan-penghidoepan laloe, jang bibitnja soedah ditanem, dan tentoe moesti toemboe aken ia petik boehnja jang beroepa kabaekan.

Jang dibilang „tida langsoeng“ jaitoelah lantaran, boeat bikin itoe kebon atawa sawah selaloe tinggal soeboer dan memberi hatsil bagoes, si tani tadi moes.

ti bekerdja aken oendjoek karadjinannja, seperti mema-tjoel, meloekoe, alirken aer, mengored (tjaboetin roempoet) taro gemoek dan laen-laen lagi. Tegesnya itoe gandjaran baroe bisa dipetik hatsilnja kapan si tani teroes djalanken kawadjibannja sabagimana moesti. Kapañ ia oendjoek karadjinan, itoe kaberkahan jang memang tersedia ia tentoe nanti dapet.

## II.

### *Trima boedi pembalesan baek.*

Ini matjem gandjaran sifatnja begini:

Saorang jang mempoenjai anak, oepamanja, itoe anak nanti berkelakoean baek, berbakti dan menjinta sanget pada orang toeanja, jang dipiara dengan dikasih makan dan pake tjoekoep. Inilah jang dinamaken „pembalesan boedi,“ jang boekan tjoemah dateng dari anak sadja, tapi djoega dari laen-laen familie atawa sobat jang taro sympathie keras dan soeka menoeloeng atawa menoendjang segala roepa, lantaran itoe orang di dalem penghidoepan jang laloe telah sebar banjak boedi baek jang sekarang ia aken petik boeahnja.

Dalem ini hal poen ada terpetjah mendjadi doeä: deket dan djaoe, atawa langsoeng dan tida langsoeng. Jang dibilang „deket“ jaitoelah ia petik sendiri itoe hatsil dai alamken kaberkahannja. Jang dibilang „djaoe“ adalah itoe kaberkahan aken ditrima oleh anak-tjoetjoenja jang berkelakoean baek, berderadjat tinggi dan laen-laen sifat jang membikin orang toeanja toeroet dapet moeka terang dan dihormatken oleh orang banjak serta dipandang moelja.

Soeal membales boedi sabenernja tida gampang, dan ada tiga matjem boedi kabaekan jang soesah boeat orang bisa bales sapenoehnja, jaïtoe jang dateng dari Thian, dari Gouvernement dan dari Iboe-bapa.

Jang dibilang „soesah“ boekan soesah dikerdjaken, hanja soesah boeat diloenasken.

Oepmanja: Thian adaken itoe berbagi-bagi moesim jang diaatoer dengen tjotjok dan setimpal goena menoemboeken tetaneman, toeroennja oedjan, meno-djonja sinar panas, tioepan angin dan sabaginja, jang semoea mempoenjai imbangan tentoe soepaja pakerdja-an orang tani tida djadi kapiran.

Gouvernement maskipoen jang bagimana pelit dan serakah, kapan timboel bahaja katjilaka'an, oepama kalaparan, kabandjiran, penjakit sampar dan laen-laen, tida nanti ditinggal diam meliatin sambil pelok tangan, hanja tentoe rèpot berdaja oepaja aken menoeloeng soepaja pendoedoek terbebas dari itoe bahaja.

Boedi dari iboe-bapa poen tida boleh dibilang ketjil, dan sebab ini soeal soedah banjak dibilitjaraken, maka tida perloe diterangin lagi satoe per satoe dalem ini peroendingan jang ringkes, tjoemah saja maoe bilang siapa soedah ada poenja anak nanti bisa timbang dan mengarti sendiri boedinja iboe-bapa pada anak-anaknya.

### III.

*Bisa bergaoelan dengen orang-orang boediman.*

Ada banjak orang jang penghidoepannja selaloe dikiterin oleh orang-orang djahat, sobat-sobat atawa familie jang berkalakoean tida baek, palsoe, tjoerang dan meroegiken. Biar bagimana keras ia menjoba, aken tjari medan pergaoelan lebih baek, tapi tida berhatsil bagoes, kerna itoe orang jang dikira baek dan boleh dipertijaya, komoedian ternjata chianat dan dengki hati. Tapi djikaloe iż ada poenja Karma baek dari tempo doeloe, dengen tida soesah ia bisa hidoeplalem golongan orang baek, pande, terpeladjar dan berboedi. Maski kadoedoekannja rendah dan boekan berätsal dari golongan terpeladjar, tapi ia nanti dapet djalan atawa „djodo“ jang membikin ia bisa ketemoe itoe orang-orang baek dan berboedi, jang faham kabatinan dan mengarti betoel tentang Dharma.

hingga ia bisa beroeroe akan djalanken kasoetjian (*Sioe-heng*) jang membikin ia lekas dapet kamadjoean rohani.

Dalem oeroesan kadoenia'an poen begitoe djoega. Kaloe ia ada saorang dagang, ia nanti dapetken pegawe atawa pesèroe dagang jang djoedjoer, setia dan pande, hingga pakerdja'nnja berdjalanan bérès dan slamet.

Dalem soeal kabatinan, itoe gandjaran ada mempoenjai djoega doe sifat: deket dan djaoe. Jang dibilang „deket“, hatinya djadi tetep, mateng dan oelet atas pakerdja'nnja Dharma, hingga tida bisa sangsi atawa tergojang lagi. Hatsil jang „djaoe“ adalah boekan sadja ia bisa bergaoel dengen orang-orang baek, pande dan boediman, tapi djoega ia nanti bisa rapet sama goeroe-goeroe jang paling oeloeng, jang paling moelja dan soetji, jang nanti kasih pengoendjoekan dan pimpinan sampe ia bisa tamatken pengartiannja dan toeroet masoek ka dalem kalangan soetji.

#### IV.

##### *Berkah dari perboeatan baek jang menambahken kaslametan.*

Ini matjem gandjaran dari Karma-baek di tempo doeloe nanti membikin itoe orang dari waktoe terlahir soedah mempoenjai tabeat dan kalakoean jang baek, seperti tida soeka memboenoeh barang ber-djiwa, tida dojan alkohol atawa madat dan laen-laen barang jang membahajaken, tida poenja nafsoe jang keras, atawa ia bisa tindes hawa nafsoenja, hingga hatinya tida perna djeloes, sirik, dengki, temaha dan sabaginja; djoega tabeatnya tida brangasan, selaloe tentrem, besar kamoerahannja, soeka mengamal, pendeknya tida bertentangan dengen wet dari Kabeneran atawa Dharma.

Ini sifat jang oetama terkadang orang bisa dapet dari beladjar aken perbaeki batinnja, hingga saorang jang djahat bisa djadi baek; ada djoega orang jang memang sadari terlahir soedah berwatek baek dan soetji, jaitoe jang dibilang „pembawanja“ sendiri. Ini watek atawa pembawa-djadi sabetoelnja ada kaberkahan jang ia dapet dari lantaran Karma baek jang ia tjiptaken dalem penghidoepan dari tempo doeloe.

Ini matjem kaberkahan poen ada mempoenjai doea sifat: deket dan djaoe. Jang dibilang „deket“, jaitoe itoe orang poenja kalakoean dan perboeatan djadi bersih, tida soeka oetjapken apa-apa jang tida bener, terdjaoe dari kadjahatan, tida perna pikirken apa-apa jang boeroek, hatinja tida soeka mengoerêk, mendêndêm, ingin membales djahat atawa menjilakaken sesamanja, hingga hidoeprja bisa tinggal tênrêm. Jang dibilang hatsil „djaoe,“ jaitoe jang tida lantes kaliatan dengen tjepet, adalah itoe orang poenja badan selaloe tinggal sehat, bisa bekerdja berat zonder merasa tjape, terbebas atawa djarang sekalih kalanggar penjakit jang berbahaja, oemoernja pandjang, aer moekanja terang dan awet moeda, sedeng pikirannja selaloe senang dan girang.

### V.

*Mempoenjai imbangan sama rata dalem segala hal.*

Ini matjem gandjaran nanti membikin itoe orang poenja perfimbangan dalem segala hal selaloe adil, sama-rata dan tida berat sabelah. Kapan berada dalem kadoedoekan tinggi ia tida angkoe atawa sombong, dan kadoedoekan rendah atawa hina tida bikin ia menjesel. Oentoeng dan roegi, dipoledji atawa ditjelah orang, ia pandang satoe roepa, tida girang dan tida djengkel. Dalem ini hal poen ada terdapet doea sebab: deket dan djaoe. Itoe sebab jang „deket“ ada diwoedjoetken dalem sapoeloeh matjem kabe-

djikan, seperti berikoet:

1. Hati dermawan dengen tida ada bosennja.
2. Bisa djalanken wet dan larangan dari Dharma.
3. Tinggal sabar terhadep segala hal tida enak jang ia alamken, seperti karoegian, kahina'an, tjelahan, kailangan dan sabaginja lagi.
4. Radjin dan dapet hatsil bagoes dari Meditatie (*Sioe-lian*).
5. Radjin melakoeken pakerdja'an menoeroet ma-oenja Thian.
6. Tjerdkik, tida gampang dipengaroehin dalem oeroesan doenia.
7. Berhati kasihan dan menjinta pada sesama machloek.
8. Berhati moerah, bersedia aken mengaboelken atawa meloeloesken apa jang orang minta.
9. Bersedia aken menoeloeng atawa mengasih, tida sekakér, koekcoeh, temaha atawa kemaroek.
10. Tida aken moendoer lagi dari toedjoeannja aken mentjari kabeneran (Dharma).

Kaberkahan jang „djaoe“ atawa tida lantes terliat, ada begini: Ia aken terloepoet atawa terdjaoe dari tiga matjem bahaja jang timboel dari api, aer dan angin.

## VI.

*Lantes bisa petik boeah dari kabaakan.*

Ini matjem kaberkahan nanti membikin orang terbebas betoel-betoel dari segala penggoda atawa kadjahatan jang timboel dari hati, pikiran, moeloet atawa badan, jaitoe toedjoeannja soedah tetep, tida bisa kena digoda atawa dikiserken lagi, hingga tida nanti bisa terdjeroemoes ka dalem kadosa'an. Gandjaran dari ini Karma baek ada terbagi doe: deket dan djaoe. Jang dibilang „deket“ jaitoe pikirannja selaloe aman dan tentrem, dan jang „djaoe“ jaitoelah bisa

rampoengken atawa tamatken pakerdja'annja jang soetji itoe, hingga ia bisa dateng di Negri Kaberkahan (*Kik Lok Kok* atawa *Soekawati*) aken berkoempel sama Buddha-buddha atawa Arhat (Loo-han).

VII

*Terbebas dari Karma, atawa terlolos dari kalahiran dan kamatian.*

Inilah ada berkahnja Karma-baek paling tinggi, jang tjoemah didapet oleh orang jang soedah sampoerna kasoetjiannja, dan nanti membikin ia bisa sampe ka dalem katentreman Nirwana. Satoe kalih ia soedah itjipin itoe katentreman, pastilah boeat selama-lamanja ia aken terbebas dari segala karoewetannja doenia jang fana; dengen begitoe ia poen terdjaoe dari segala kasangsara'an doenia, kerna soedah bersatoe sama itoe Dharma, dan bekerdja menoeroet maoenja Thian.

Disini poen ada terdapet doea matjem berkah: deket dan djaoe. Jang dibilang „deket,” jaitoelah ia terlolos dari djiretannja tiga matjem siksa'an jang djadi bagiannja manoesia, jaitoe (1) kalahiran, (2) oemoer toea dan penjakitan, dan (3) kamatian.

Kaberkahan jang „djaoe” jaitoelah dengen bersatoenja pada alam loehoer poenja tenaga *Sloe-heng*, ia bisa sampe pada kadoedoekan jang dinamaken *Sambuddhasa* jang amat moelja, mendapet kabebasan sampoerna, tida oesah terlahir poelah ka doenia.

*Sampe dusini ini lezing berachir.*

---

# Mentjari Katentreman Hidoep.

OLEH KWEE TEK HOAIJ.

*Lezing dari Batavia Buddhist Association di klen-teng Kwan Im Tong pada tanggal 4 Juni dan 30 juli 1936.*

Soedara-soedara,

Toedjoean dari semoea agama adalah boeat mentjari katentreman. Tetapi maskipoen di doenia sekarang ada terdapat agama-agama besar jang mempoenjai banjak penganoet, kaliatannja tida bisa memberi kapoeasan, hingga sabentar-bentar moentjoel Goeroe-goeroe kabatinan jang menjiarken peladjaran dengen pake roepa-roepa nama, peladjaran mana katanja bisa digoenaaken sebagai „penawar“ aken memberi katentreman dan kaslametan bagi manoesia.

Antara itoe berbagi-bagi peladjaran jang tida bersifat agama tetapi katanja bisa memberi katentreman seperti djoega jang didapet dari agama, saja maoe seboet sadja doe, jang boekan sadja teritoeng paling baroe, tapi djoega tida terlaloe asing bagi sadjoemblaah pendoedoek di Indonesia, jaitoe : peladjarannja Krishnamurti dan peladjaran dari Kiajie Ageng Soerjomataram jang dinamaken *Ilmoe Begdjo Langgeng*. Peladjaran jang terseboet belakangan ada tersiar loeas di Djawa-Tengah dan Wetan, boekan sadja antara orang pri boemi tetapi djoega antara bangsa Tionghoa. Belon lama Pakoempoelan Penerangan Batin di Soerabaja soedah ondang itoe Kiajie Ageng boeat beriken doe kalih lezing dalem roemah pakomoeloannja, lezing-lezing mana pastilah telah dapet perhatian penoeh dari sekalian orang Tionghoa di Soerabaja jang soeka pada kabatinan.

Peladjarannja Krishnamurti poen dapet perhatian dari segala bangsa, teroetama orang Europa Kaoem Theosofie, maski djoega djoemblaah belon terlaloe banjak. Kabarnja laen taon Krishnamurti aken dateng

di Java, dan saja rasa bakal bertambah djoemblahnja orang jang aken ketarik pada peladjarannja.

Ini doea peladjaran, dari Krishnamurti dan dari Kiajje Ageng Soerjo Mataram, boekan bersifat agama, hanja samatjem philosofie dari kahidoepan jang, kapan orang soedah mengarti betoel, bisa memberi katentreman lahir dan batin. Kiajje Ageng dengen djelas maloemken, bahoea itoe ilmoe jang ia siarken tida bertentangan dengen agama, kerna ada ilmoe kanjata'an (kabeneran) jang sasoeatoe orang bisa rasaken sendiri dan tida soesah aken dimengarti, kaloe sadja „soeka memikirken.“

Peladjaran dari Krishnamurti poen ada mirip begitoe. Boekan sadja tida bersifat agama, hanja malah Krishnamurti memberi inget soepaja orang djangan bergantoeng pada siapa djoega, tida perdoeli Allah, Toehan, Nabi, Dewa, malaikat, atawa poen kitab-kitab jang teranggep soetji, hanja masing-masing orang haroes tjari itoe kabeneran di dalem batinnja sendiri dengen djalan memikir, memeriksa dan menimbang, menoeroet pengalamannja dalem kahidoepan. Satne kalih orang soedah bertaloek pada titahnja salah satoe Nabi atawa apa sadja jang ia poedja, timdakantja boest tjari kamadjoean sendiri lantes mandek, kerna apa jang ia pikir dan lakoeken boekan dateng dari pendapatan atawa kapoenja'an sendiri, hanja barang tinoean jang ia tjoemah *perfjaja* sadja, sedeng ia sendiri tida poenja bebolehan jang berharga.

Kapan orang perhatiken pada apa jang sekarang diadjor oleh Krishnamurti, ternjata isi atawa sarinja tida laen, hanja itoe saroepa kabeneran djoega seperti jang ada terdapet dalem peladjaran Buddha, *Bhagavad Gita* atawa dalem Lao Tze poenja *Tao Teck King*, tjoemah sadja tjaranja ia petjahken ada berbeda, soepaja menjotjoki pengartian dan ka'ada'an

dari djeman sekarang. Djadinja, oepama sajoer, bahan atawa sajoerannja atawa dagingnja saroepa, tjoemah tjaranja memasak dan menaro boemboe ada berlaenan, lebih modern.

Inilah tida oesah diboeat heran, kerna jang dinamaken Kabeneran (Truth, Dharma, Waarheid) t oemah *satoe*, dan ini seloeroeh djagad ada terlipoeit oleh *saroepa* Kabeneran, tida ada doea atawa t ga matjem. Maka satoe peladjaran jang bener biar poen apa djoega namanja dan bagimana berbeda tjara artikenja atawa kaliatannja dari loear, *moesti mempoenjai sari* atawa rasa jang sama.

Oepama itoe toedjoean dari Krishnamurti aken tida mengandel pada Nabi-nabi, Goeroe-goeroe atawa Kitab-kitab jang terpandang soetji, hanja *moesti* mentjari itoe kanjata'an di dalem diri sendiri, inilah *sabenernja* soedah dioetjapken oleh Buddha pada 25 abad jang laloe. Maka zonder peihatiken terlaloe dalem pada itoe peladjaran, seperti djoega pada itce ilmoe Begdjo Langgeng dari Kiaje Ageng, orang poen bisa lantes taoe, bahoea sari atawa pokok dasar dari itoe peladjaran tida bisa njelisir djaoe dari Buddhisme dan laen-laen philosofie jang tinggi, baek dari bangsa Hindoe atawa poen dari bangsa Tionghoa.

Pakoempoelan Buddhist Association dan Sam Kauw Hwe, sedeng ada taro harga dan indahin pada semoea peladjaran batin jang bersatoe haloean, ada mengandoeng toedjoean boeat tjoba kasih oendjoek jang di dalem Buddhisme, dengen ditambah lagi oleh peladjaran philosofie dari Khong Kauw dan Too Kauw, poen orang bisa dapét itoe matjem penerangan, pengartian dan penghiboeran, seperti itoe ilmoe-ilmoe jang baroe disiarken dengen pake laen matjem tjap atawa merk. Itoe katentreman jang orang Tionghoa hendak tjari dengen berkoetetan di loearan, sabetoelnya soedah lama ada tersedia *dalem roemahnja*

sendiri, tjoemah sadja katoetoepan deboe dan ke-labangan, hingga tida kaliatan lantaran soedah lama tida perna diopèn. Maka marilah sekarang kita sèkah dan bersihken itoe kakotoran jang bertimboen lantaran kita-orang sendiri poenja alpa dan males, dan liatlah ! Poesaka dari leloehoer kita poen tida kalah kagoemilangannja dengen itoe segala philosophie kabatinan jang bersifat lebih modern.

Sabagi tjonto, marilah kita timbang soeal mentjari katentreman atawa kalanggengan, menoeroet seperti jang Buddha adjar, apa bisa dipake dalem penghidoepan sekarang atawa tida. Menoeroet Buddha, katentreman hidoeplang sedjati tida bisa d'dapet kapank orang belon sanggoep tindes segala kainginannja aken poenjaken barang doenia jang bikin dirinja teriket. Ini matjem peladjaran banjak jang anggep kliwat soesah didjalanken, kerna sasoeatoe orang jang hidoeplang di doenia moesti ada poenja kaperloe-an, dan dimana ada *kaperloe-an* disitoe moesti ada *djoega kainginan*, maka kaloe itoe kainginan diseroe tindes atawa singkirken, manoesia djadi tida bisa berdaja, hingga hidoeplang terlantar atawa kipitan, hal mana membikin kamadjoean doenia djadi mandek !

Ini anggepan kliroe soedah moentjoel lantaran orang salah mengarti, jang Buddha boekan larang orang bekerja goena kaperloe-an hidoeplang, atawa soene orang cijangan menika, hanja teroetama soepaja orang mengarti jang sifatnya segala barang doenia tida bisa hekel : apa jang tertjipta bakal moesna, jang terlahir aken muti, hingga apa jang orang dapet dan poenjaken *moesti* terlepas dan ilatig kombali. Oepama sekarang kita ada poenja banjak harta, istri, anak-anak dan sabaginja lagi. Jiar poen sa'ande kata itoe kakaja'an tinggal tetep, istri dan anak-anak kita semoea hidoeplang soeboer dan sehat, toch tida oeroeng

kita aken *kailangan* itoe semoea kapan sampe temponja aken kita masoek ka lobang koeboer. Kita *moesti tinggalken* dan *lepaskan* apa jang kita anggep sabagi milik dan kapoenja'an !

Tetapi djikaloe sekarang kita-orang soedah insjaf atas tjara bekerdjanja itoe natuur-wet jang tida bisa disingkirken lagi, dan bersedia aken lepaskan semoea barang doenia hingga tida merasa berat dan teriket pada itoe semoea, pikiran kita aken tinggal tentrem kapan sa'ande itoe kakaja'an moesna atawa djadi banjak soesoet lantaran roegi dagang dan sabaginja hingga traoesah djadi seperti orang gendeng saking terlaloe pikirin itoe milik jang linjap ; traesah begitoe sedih dan poe toes harepañ kaloe familie atawa sobat jang tertjinta meninggal doenia, dan kita poenja roh, kapan kita meninggal, traoesah bergelandangan di Kamaloka lantaran berat sama milik dan familie jang ditinggalken di doenia.

Buddha tida larang orang poenjaken milik, istri, soeami dan anak-anak, kerna itoe semoea tida menjadi halangan kaloe sadja orang *mendoesin* dan *mengarti* jang itoe semoea ada bersifat fana (tida kel) hingga djangan bikin diri djadi *teriket* oleh marika.

Apa jang dimaksoedken dengen itoe perkata'an „teriket“ saja maoe tjoba terangken dengen satoe tjonto.

Satoe orang ada poenja bebrapa anak jang ia *sangget tjinta* dan *ingin* soepaja marika semoea bisa hidoeper beroentoeng dan mendjadi orang jang pantes dan terhormat. Ini pikiran ada baek dan bener, jang *hasoes* diampoenjai oleh sasoeatoe iboe atawa ajah jang kenal kawadjibannja.

Boeat bikin itoe anak-anak mendjadi seperti jang diharep, tentoe sadja marika semoea moesti dikasih masoek dalem sekola jang baek, oepamanja di H.C.S.,

boeat mana ia wadjib membajar oewang sekola dan kasih pakean jang pantes aken itoe anak-anak pake saban kalih pergi ka sekola.

Djikaloe si ajah ada saorang mampoe, tentoe sadja tida ada kasoesahan apa-apa. Tetapi saorang miskin, apalagi kaloe ia werkloos, itoe kainginan aken bikin itoe anak-anak djadi pinter sedeng ia tida mampoe bajar oewang sekola, ada djadi samatjem poekoelan heibat jang melinjapken iapoenna katentreman !

Sabaliknja, saorang tani di desa dengen bebrapa belas anak, bisa tersenjoem girang maski hatsilnja tjoemah doeapoeloeh cent sahari, sebab itoe anak-anak, jang ia tida ingin soeroe masoek sekola, bisa bantoe menggarap kebon, berkoeli, disoeroe angon kambing dan laen-laen pakerdja'an jang memberi hatsil dan ada faedahnja boeat toendjang familie.

Sa'ande kata sang ajah sanggoep ongkosin anak-anaknja aken masoek sekola, masih pikirannja tida bisa tentrem. Ada banjak ajah jang djadi seperti kajap koetika meliat rapport sekola dari anak-anaknja kabanjakan djelek.

Ada lagi ajah jang kadjengkelan satengah mati kerna, sedeng anaknja tjoekoep pinter dan sanget giat beladjar, tapi ia terpaksa soeroe brenti kerna sida koeat ongkosin lebih djaoe.

Jang paling tijlaka kaloe itoe anak soedah masoek di sekola tinggi tida bisa diteroesken lantaran djelek-nja ka'ada'an oewang. Itoe anak seringkalih anggep dirinja *dikspirasi* oleh sang ajah, jang ditoedoeh tida maoe lakoeken pengorbanan sapenoehnja aken goena iapoenna kaberoentoengan.

Terkadang ada djoega ajah jang bikin oetang kanan kiri, atawa sesambat minta toeloeng pada sobat-sobat dan familienja, soepaja bisa teroesin peladjaran anaknja jang soedah kepala tanggoeng. Kaloe boleh ia maoe „gade kepala“ aken goena itoe anak,

Ada djoega iboe-bapa jang hidoe p dengen tjekèk lèhèr, bekerdja seperti koeli èmbrat, tjoemah soepaja bisa sekolain teroes pada anak-anaknya sampe tamat.

Dan, apa tjlaka, sasoedah tamat beladjar dengen pegang diploma atawa titel beroemilang, serta balik dari negri Belanda dengen bawa Mevrouw ramboet djagoeng, itoe anak tida bisa dapet pakerdja'an jang satimpal sama kapinterannja, atawa tinggal teroes-meneroes djadi werkloos, hingga moesti ditoendjang oleh orang toeanja jang soedah mègrèk !

Ada begitoe banjak sebab atawa lantaran dari lelakonnya anak jang membikin iboe-bapa selaloe djengkel dan berkoeatir, liujap kasenangannja, hingga tida bisa rasain sama sekalih apa itoe jang diseboët katentreman.

Oepamanja :

Si anak pinter, sehat, bisa dapet hatsil tjoekoep tapi „poet-hauw“ . . . . atawa: kena pengaroeh „setan bantal“ sampe tida maoe kenal pada iboe-bapanja . . . .

Si anak baek, „oe-hauw“, radjin beladjar atawa bekerdja, tapi . . . . kasehatannja sering terganggoe atawa oemoernja pendek . . . .

Itoe anak kalakoeannja tjoekoep memoearken, tapi nasifnya boeroek . . . . bekerdja tida bisa awet, atawa saban dagang dapet roegi, sedeng anaknya ada banjak dan istrinja sering sakit . . . .

Traoesah dibilitjaraken anak-anak jang djahat, moraal bedjad, djadi pemogoran, pendjoedi atawa pemadatan, atawa kena perkara lantaran lakoeken penipoean, atawa borosken milik orang toeanja, dan banjak laen-laen lagi.

Dalem ka'ada'an begitoe, tjara bagimanatah satoe ajah atawa iboe, jang sanget tjinta dan hendak bélakan anak-anaknya dengen sa'antero tenaga, nanti bisa dapetken katentreman ?

Ada begitoe banjak doeri, tjoebloek, djoerang dan djiretan di tengah perdjalanan dari sasoeatoe anak, dari sasoeatoe manoesia, jang di saban sa'at bisa menimboelken kakoeatiran, kadjengkelan dan kasedihan !

Satoe orang jang mempoenjai lima anak, maski jang ampat ada baek, slamet dan beroentoeng, tapi kapan jang satoe berkalakoean djahat atawa bernasif tjilaka, itoe *satoe* soedah tjoekoep boeat bikin fikirannja tertindes oleh kadoeka'an heibat.

Dan orang toea jang sajang anak, soedah tentoe moesti sajang djoega pada tjoetjoe-tjoetjoenja, malah terkadang ada jang bilang ia lebih sajang si tjoetjoe dari-pada si anak. Dengan begitoe kombali moentjoel sadjoemblah soember dari kasoekeran, kakoeatiran, kadjengkelan dan kasedihan jang memoesnaken katentreman.

Ini semoea ada boeah hatsil jang moesti dipetik dari lantaran sang ajah atawa iboe *sanget tjinta* pada anak dan kandoeng KAINGINAN keras aken bikin itoe anak-anak semoea djadi beroentoeng, slamet, terhormat, enz. enz.

Abis moesti bagimana ? — brangkalah ada orang jang hendak menanja : — apatah itoe ajah moesti biarkan anak-anaknya tinggal bodo dan tida taoe mata soerat soepaja tida oesah poesing boeat ongkosin marika beladjar ?

Orang jang ingin dahar biefstuk tapi di sakoenja tjoemah ada oewang lima cent, ia boleh *tindes* itoe *kainginan* dan merasa poeas dengan tèmpè atawa onsjom goreng. Siapa maoe hidoepleng dengan pake ongkos jang melebihii dari kakoeatannja, itoelahi tan-danja „tida taoe diri.“ Ia boleh tjoba segala roepa, tapi dengan begitoe ia tida bisa dapetken katentreman.

Kapan itoe ajah *lepaskan* kainginannja aken bikin anak-anaknya terpeladjar tinggi, belon pasti jang marjka semoea aken tjilaka, kaloe sadja di dalem

roemah jang mendjadi iboe-bapa bisa didik marika dengen toeladan dan perboeatan soepaja mendjadi orang-orang jang baek. Sekola tjoemah bikin itoe anak-anak djadi *pinter*, tapi tida bisa bikin marika poenja batin djadi *baek*. Djoestroe kabersihan batin ada „kapitaal” paling berharga jang bisa mendatengken hatsil bagoes dalem kahidoepan. Maka saorang jang tida mampoeh kirim anaknya ka sekola jang tinggian tida moesti terlaloe djengkel, kerna maskipoen itoe anak-anak tjoemah sekola Melajoe di kampoengan, kaloe giat dan radjin beladjar sendiri, iaorang poen nanti bisa tambahken pengataoeannja.

Maka satoe ajah jang berkoekoeh maoe paksa diri aken bikin anak-anaknya pinter sedeng ia tida koeat pikoe ongkosnya, belon tentoe bisa bikin itoe anak-anak djadi beroentoeng, tapi *soedah pasti* si ajah poenja penghidoepan sendiri penoeh kasoesahan dan kadjengkelan, hingga tida bisa dapet katentreman.

Salagi oering-oeringan lantaran tida kasampean kainginannja boeat bikin anak-anaknya djadi pinter, terpeladjar dan terhormat, itoe ajah boleh lempar ka laoet iapoenna aboe-leloehoer (hiolouw) aken masoek Kristen, atawa pergi di tempat pertemoeannja Pinkster Gemeente, aken toeroet bertreak „Haleloejah!” dan minta diampaenin dosa sambil menangis sesenggoekan, atawa memoedja di kramat, atawa sembahjang di klenteng, atawa minta doekoen-doekoeng petangan dan sienshe-sienshe khoamia toeloeng liatin pe-roentoengannja, atawa minta kijas pada Kijaie atawa Soe-hoe jang termashoer. Pendeknya orang boleh berdaja dan sesambat *segala matjem*, tapi itoe kasoesahan tida aken menjingkir sabegitoe lama itoe soember, jang beroepa KAINGINAN, belon disoempel sampe tida mengalir lagi.

Kaloe ini satoe soeal, jang menjangkoet kainginan **pantes** boeat kasih peladjaran pada anak-anak, banjak

orang telah alamken kasoekeran heibat jang mem-bikin terganggoe katentremanja, soedara-soedara bisa pikir sendiri, kasangsara'an, kakoeatiran dan ka-sedihan bagimana jang manoesia telah alamken lantaran ada kandoeng *sakean banjak matjem ka-inginan* antara mana sabagian besar ada bersifat bodo atawa tida sehat!

Itoe orang — ajah atawa iboe — jang terlaloe iboek pikirin aken didik dan pimpin anak-anaknja hingga moesti bikin linjap dan roesak katentremanja sen-diri, tida insjaf jang di *saban sa'at* ia poen bisa dibikin *terpisah* dari itoe anak-anak oleh kamatian. Pengabisannja satoe waktoe toch itoe anak-anak *moesti* dilepaskan aken hidoepl sendiri. Tida semoea anak-anak jang ditinggal mati oleh ajah atawa iboenja, atawa djadi piatoe sama sekalihi, lantes terlantar, tjilaka atawa djadi djahat. Masing-masing orang ter-lahir ka doenia dengen mengandoeng Karma atau masiñja sendiri, jang tida bisa lantes dirobah oleh ban-hoean dari iboe atawa ajah. Maka sedeng jang djadi orang hoea haroes menoeloeng anak-anaknja apa jang ia sanggoep, ia poen tida haroes alpaken djoega itoe kawadijiban akem *menoeloeng diri sendiri* jang perloe diperlukan katentreman, sebab tjoemah orang jang pikirannja tentrem baroelah bisa dapet kama-djeuan batin dan terbebas dari gentjetannja kasang-sara'an doenia. Dijadinja biar poen itoe orang ada poenja banjak anak dan laen-laen tanggoengan familie, tida halangan djikaloe ia singkirken itoe segala maksoed, kainginan atawa angen-angen goena kathaékan marika, djikaloe boeat sampeken itoe ia moesti bikin penghidoeppanja sendiri djadi kaloet, sangsara dan penoech dengen gontjangan, apalagi djikaloe moesti meroesak badan atawa batin sendiri, oepama lantaran perloe oewang boeat toendjang familie, hatinja mendjadi kedjem, hingga sang ajah

# Sam Kauw Hwe Telokbetong.

*Lezingnja Toeuan Thio Boen Siat dalem per-  
temoean di Klementeng Thay Hien Bio,  
tanggal 24-1-'36 dengen kalimat:*

## APATAH KITA PERLOE DENGEN AGAMA ?

Atas andjoerannja bestuur Sam Kauw Hwe boeat saja membikin sedikit propaganda di Tay Hin Bio di ini Tjia Gwe Tje-It. Dengan meloepaken kabodoan saja dan menginget jang S. K. H. ada bermaksoed soetji, dengan ridlah hati saja loeloesken perminta'an itoe. Boeat mana sebagi saja jang pertama kalih naek di podium, ada merasa sanget berat dan kikoek. Djika njonja-njonja dan toeuan-toeuan dapet perasa'an jang tida memoeasken atas saja poenja pembitjara'an

tida sangsi aken menipoe dan si iboe sampe lakonin djadi boengaraja atawa laen-laen perboeatan jang tida bedjik.

Maka kapan menimbang pada ini semoea kita-orang poen bisa mengarti, bahoea Buddha poenja pengadjaran aken lepaskan kainginan jang berhoeboeng pada doenia sasoenggoenja ada recept satoe-satoenja jang paling mandjoer boeat dapetken katentreman, hingga biar poen orang pergi pada goeroe jang mana sadja, atawa peladjarin ilmoe atawa agama apa sadja jang paling dikasohorin, ia tida nanti terbebas betoel-betoel dari segala matjem kasoekeran dan kadoeka'an sabagitoe lama ia masih tinggal koekoeh aken *pegangin dengen keras* itoe sakean banjak *kainginan* jang berhoeboeng dengen oeroesan doenia.

Dengan pendek: orang moesti toentoet peng-hidoepan menoeroet kaoem Buddhist poenja symbool poehoen trate jang maski toemboe di tengah rawa tetapi itoe aer tida bisa melèngkèt pada kembang dan daon-daonnja.

dan stijl-nja, terlebih doeloe saja harep dima'afken.

Kenapa saja ambil ini kalimat: „Apatah kita perloe dengen Agama?“ Jaitoe kerna saja merasa ketjiwa sekalih jang kita orang Tionghoa poenja agama ada sanget kaloet, baek di Indonesia, maoe poen di Tiongkok! Toemboenja saja poenja perasa'an boekan baroe di sa'at ini sadja, tentang agama Tionghoa. Soedah lama, ja lama sekalih, kira-kira doe-poeloeh taon jang laloe. Tempo-tempo saja ada bikin satoe pertanja'an dengen diri sendiri: „Sabetoelnja agama apatah jang saja peloek?“ Dengan teroes terang saja misti mengakoe di hadepan njonja-njonja dan toeantoean, „tida taoe.“ Boekankah ini penjaoetan ada sanget ketjiwa dan menjedihken boeat kita orang Tionghoa rata-rata?

Saban-saban bangsa Europa kaloe ditanjaken agama apatah jang ia orang pegang? Zonder pikir-pikir dan bingoeng dengen lantas kita dapet djawaban:

Katholieck, Protestantsch, enz. Boeat sebagian besar dari bangsa Indonesier Mohamedaansch.

Nah, tjoba sekarang tanja pada saban-saban bangsa Tionghoa, boleh dipastiken sabagian besar kita nanti dapet djawaban dengen angkat poendak! Disini saja tjoba terangken itoe sedikit tjonto-tjonto, boekan sadja memalloeken kita-orang Tionghoa rata-rata, tapi, boleh dipastiken di dalem 50 taon j.a.d. kita tida kenal lagi siapa itoe Khong Tjoe, Lao Tze dan Buddha! Di Betawi saja ada satoe kenalan bangsa Tionghoa. Di satoe Istania ia dapet koendjoengan dari satoe kenalan jang menganoet laen agama. Sasoedahnja laotang hitjara laen-laen oeroesan, saja poenja kenalan dapet pertanja'an begini: „Agama apatah jang Toeantoean pegang?“ Helaas! Dengan moeka merah dan djenga ia snoetken: „Saja tida memegang agama apa-apa.“

Sabedoelnja saja poenja kenalan itoe boekan ada satoe vrÿdenker, atawa satoe orang jang tida menge-

nal Allah dan berhati kedjem. Tida, ia ada satoe orang jang moerah hati dan soedjoet pada Allah begitoepon hormat pada laen-laen agama. Tjoemah, sabagimana saja bilang tadi jang kita orang poenja agama ada sanget kaloet, tida teratoer.

„Ja, djika Toean tida memegang soeatoe agama, boekanlah lebih baek ikoet sadja sama saja poenja agama dari Toean tida pegang sama sekalih?“ Begitoelah saja poenja kenalan dapet tawaran, djandjidjandjian dan boedjoekan jang moeloek dari iapoenia kenalan itoe. Tapi ia masih pertijaja jang kita boekan tida mempoenjai agama, maka dengen manis ia telah tolak tawaran itoe.

Apa salah djika kita orang Tionghoa banjak jang lari ka laen-laen agama, sedeng itoe orang-orang jang soedah pindah ka laen-laen agama laksana orang jang sanget aoes, ingin sekalih minoem aer, tapi di tempajan sendiri soedah kering, terpaksa dengen apa boleh boeat laloe tjari aer pada tetingga-tetingga agar bisa ilangken itoe rasa aoes jang sanget. Dengan djoedjoer saja bilang jang itoe orang-orang jang soedah pada lari ka laen agama tida boleh disalahken.

Jang salah kita poenja pamoeka-pamoeka agama tida maoe siarken dengen loeas dan jang berpengartian tinggi tentang agama tjoemah boeat dirinja sadja. Tida heran jang propagandist-propagandist agama laen toedjoeken matanja pada bangsa Tionghoa kerna ia-orang taoe agama Tionghoa ada kaloet, tida mempoenjai organisatie jang sampoerna! Dus, gampang sekalih iaorang aken sebar itoe bibit setjara loeas. Disini djoega saja ingin terangken jang bangsa Tionghoa ada pandang sanget enteng dan alpaken pada agamanja, seperti aer dan minjak. Kita boekan tida mempoenjai agama jang sampoerna seperti apa jang orang ada anggep. Sedari djeman doeloe soedah dibikin dan disiarken oleh kiتا poenja nabi-nabi

agoeng, tjoemah kita orang Tionghoa ada sanget kouwkati, terlaloe koekoeh sama oeroesan familie dan terlaloe memboeroe sama kaoentoengan. Oeroesan familie dan membcoroe kaoentoengan ini memang perloe bagi kita poenja penghidoepan. Tapi, terhadep agama djoega djanganlah sekalih-kalih dipandang enteng dan tida perloe! Lantaran orang Tionghoa poenja pandang enteng pada agamanja dan alpaken itoe, maka sampe di Tiongkok sekarang mendjadi kaloet dan banjak tempat tempat soedah dipegang oleh bangsa-bangsa laen, begitoelah menoeroet kata-nja satoe penoelis. Ini boeah pikiran boeat saja sasoenggoenja ada sanget tjetjok. Tjobalah liat ka'ada'an Tiongkok sekarang, bagimana sedih dan mendjengkelken meliat kita poenja tanah Bapa jang sedeng katerdjang crisis. Djika sedari doeloe kita poenja agama soedah teratoer beres dan orang Tionghoa tida pandang enteng sama agamanja, tidualah sekarang Tiongkok djadi terpetjah-belah dan kaloet! Meliat punt-punt jang saja bitjaraken tadi dan tengok pada kita poenja penghidoepan hari-hari, *apakah kita tida perloe sama agama?*

Dengan soenggoe-soenggoe saja seroehken pada bangsa Tionghoa: Insjaflah, sedarlah pada kita poenja agama jang maha soetji! Peganglah dengan soenggoe-soenggoe, jakinkenlah dengan tida mengenal bosen! Boekan sadja boeat goenanja kita poenja tanah Bapa, bangsa dan anak-tjoetjoe, djoega bergoe-na besar boeat diri sendiri.

Pepatah ada bilang: „Manoesia jang tida memegang agama, seperti koeda tida mempoenjai lès.“ Mak-soednja: Satoe koeda jang tida mempoenjai lès soedah tentoe tida ada jang kemoediken ia poenja lari, dus, ia bole gampang noebroek pager, tiang listrik, enz. Atawa djika manoesia tida memegang agama: gampang sekali djadi njasar djalan, kena

boedjoek-boedjoekan jang tersesat, tida tahan itoe goda-goda'an jang terkoetoek, dan itoe hawa napsoe jang djahat. Ini semoea di saban seconde bisa ke-djadian.

Bagimana boengah dan besar pengharepan saja sasoedahnja meliat berdirinja Sam Kauw Hwe di Telok Betong dan tempat-tempat laen, jang saja pertjaja aken djadi satoe penjoeloeh bagi bangsa Tionghoa agar lebih mengenal dan jakinken pada agamanja.

Bagimana soetji adanja itoe bangsa Europa jang saban Minggoe pergi ka gredja, bangsa Indonesier saban Djoemahat pergi ka mesdjid boeat Sembahjang aken goenanja masing-masing merika poenja agama. Dan kenapa kita bangsa Tionghoa tida bisa atawa tida maoe koendjoengken salah-satoe bio jang soedah ditentoeken di masing-masing poenja tempat saban Tje-It dan Tjap-Gouw boeat mendengerken lezing-lezing dan peladjaran dari kita poenja nabi-nabi agoeng jang memang sekarang sedeng di-organiseerd oleh Sam Kauw Hwe.

Boeat penoetoep dari saja poenja pembitjara'an, tida loepa saja hatoerken trima kasih pada Toean-toean bestuur Sam Kauw Hwe di Telok Betong, jang soedah kasih saja itoe kasemptan boeat Oeta-raken pikiran saja di ini Tay Hin Bio. Begitoepoen dengen njonja-njonja dan toean-toean jang soedah begitoe sabar soedi boeat mendengerken saja poenja boeah pikiran lagi sekalih saja hatoerken trima kasih dan maäf. Biarlah laen Tje-It atawa Tjap-Gouw di ini tempat k'ta orang bisa berkoempel kombali, dan saja aken pertjaja di laen Tjia-Gwe jang itoe batin soedah djadi naek satoe tingkat lebih tinggi dari sekarang !

# Sam Kauw Hwe Tempeh.

LEZING TOEAN THE-PASIRIAN.

Dalem gedong Sam Kauw Hwee ddo. 9-5-36.

Oleh :

COMITE SAM KAUW HWEE, TEMPEH.

Sebagimana biasa lebih doeloe oleh spreker dihatoerken trima kasih pada bestuur Sam Kauw Hwee dan diberiken slametnja berkoempoel pada jang hadlir, laloe olehnya dimoelai membatja lezingnja jang ada begini :

Ini malem lantaran kaboengahan serta meloepaken pengataoean sendiri hal ilmoe-kasoetjian jang masih sanget berbates sekalih, dengen membraniken hati spreker memaksaken diri membikin djoega ini „penjoegeean,“ hanja sakedar kapingin aken menjataken rasa-hati di hadepan persidangan sini, tentang „poko atawa maksoednja Sam Kauw,“ dengen pengharepan kaloe pendapatan jang terkandoeng didalem rasa-hati spreker tersesat adanja, moehoenlah soepaja persidangan, teroetama para pengataoean lebih toea, aken soeka menoeloeng membetoelken. Dan boeat mana, berikoet spreker mengirim dari atasnja ini podium trima kasih diperbanjak.

Bahoea spreker pertjaja penoeh pada persidangan, tentoe telah sampe taoe dan mengarti lebih-lebih dari jang bitjara ini, tentang artinja itoe „Sam Kauw,“ dan kawadibannja selakoe kaoem jang mentjari ilmoe-pengataoean oentoek hidoepl di ini doenia.

Memang befoel kaloe diambil setjara biasa jang kita mengataoein, bahoea adanja itoe „tiga peladjaran“ datengnja dari tiga Nabi, jaitoe Lo Tjoe, Khong Tjoe dan Buddha. Aken tetapi itoe boekan djadi sedjatinja maksoed jang bener, dan sabenernja itoe „Sam Kauw“ ada mengandoeng dari t i g a - p o k o ; jaitoe : 1. Mengoeatken persoedara'an sesama manoesia, zonder maoe memandang hal agamanja, dan roepa koelitnja

serta laki dan prempoean. 2. Teroetama koedoe memandang dan menjaringken masing masing agamanja, jalah, batinnja sendiri-sendiri. 3. Dan aken mentjari kasoetjiannja sang Toehan didalem masing-masing poenja diri, jang masih batinnja tertotoet oleh kagelapannya ini doenia.

Apa bila menilik bagi itoe tiga fatsal terseboet, ada mengoendjoek jang begitoe njata dan terang bahoea itoe „Sam Kauw“ sebagi symbool sadja, dan tida lebih itoe semoea ada djoega pada diri kita (orang). Jaitoe bagi manoesia hidoepr koedoe mengoetamaken „kawadjiban,“ itoelah djadi pokok maksoednya.

*Kawadjiban.* Kaloe menoeroet spreker poenja pendapatan ada djoega mempoenjai artian: 1. Kanjata'an. 2. Mengataoein wetnja Toehan, dan 3. Kabaikan dan melakoeken. Maka lebih tegesnjia itoe ada begini: Kawadjiban orang boeat mengataoein kanjata'an, jalah kanjata'an bagi hidoeprnia. Oentoek mengataoein Wetnja Toehan jang orang wadib melakoeken pri-kapantesan (*Gie*). Dan melakoeken kabaikan beserta mempoenjai perasa'an bersoedara pada sekalian manoesia jang sabetoelnja ada sesama-nja. Jaitoe: Soe hay tji lwee kay hing tee ja, Nabi-Khong Tjoe toch soedah berkata.

Demikian djoega bahoea itoe kawadjiban ada menjadi pokok kaslametannja ini doenia, jaitoe kaloe orang (manoesia) satoe-satoenja bisa berlakoe dan berboeat menoeroet kawadjibannja, atawa dengan laen perkata'an: boeat satoe-satoenja orang bisa taoe betoel dan menetepin itoe kawadjiban, pastilah doenia ini djadi aman dan slamet atawa bisa kaseboet sebagai doenia jang tentrem !

Tjoba liatlah toeantoean, njonja-njonja, dan soedara soedara. Bahoea sabagian besar atawa ampir semoea orang jang hidoepr di kolong doenia, jang masih

belon mengataoei bagi kawadjibannya, boekan sadja marika tida bisa merasa beroedara satoe pada laen, malah dengen soedaranja sendiri jang satoenggal iboebapa, tida bisa merasa soedara. Lantaran marika satoe sama laen bereboetan hak, dan berbareng dengen itoe laloe masing-masing mentjari akal agar kawadjibannya bisa dipikoel oleh laennja orang.

Lagi sekalih spreker mengoelangken, bahoea itoe „Sam Kauw“ poenja pokok maksoed jang teroetama jaitoe *kawadjiban* jang, boeat „Sam Kauw Hwee“ disini, wadjib menggelarken pada semoeanja orang jang maoe, aken dioendjoek masing-masing marika poenja kawadjiban, jalih manoesia hidoeplalem kolong doenia ini wadjib pertama-pertamanja : „merasasoedara“ jang terbitnja dari merasa wadjib, berlakoe dan berboeat kabaekan jang, menoeroet wetnja sang Toehan, jalih wetnja kawadjiban kanjata'an hidoepl sedjati jang . . . . setoenggal!

Menilik jang begitoe telah terang bagi kita orang selakoe kaoem „Sam Kauw,“ pertama-pertama paling perloe soepaja bisa berlakoe menoeroet kawadjibannya sendiri, dan koedoe bisa (moesti) menetepin wadjibnya hidoepl di ini doenia.

Orang selakoe taoe dari itoe „Sam Kauw,“ memang ada kawadjiban mendjaga dengen menghati-hati agar orang djangan sampe menjangtjangken diri dan kapertjaja'nnja kepada soeatoe apa, atawa pada seorang jang kita pandang lebih; memang djoega bahoea tida sasoeatroe orang jang bisa kasih oendjoek kanjata'nnja Toehan, salaennja dari lakoenna dirisendiri.

Sabagimana djoega telah sering diterangkan oleh para-berilmoe, bahoea kita-orang poenja penghidoepl di dalemna ini doenia jang rame, melenken di soeroe mendjalani kawadjiban goena mentjari kanjata'an jang ada tersemboeni di ini Alam, jaitoe oen-

toek mendapetken apa jang perloe dan haroes diketaoein didalem kahidoepannja. Penghidoepan ini ada laksana satoe djalanan jang sanget soeker diliwatin, hingga saorang jang koerang tjoekoep kewat bagi pikirannja soedah menganggеп jang hidoeppnja itoe seperti satoe hoekoeman jang moesti didjalanken dan moesti memikoel itoe „s e k s a ' a n - n a - r a k a“ sampe dateng wakoe adjalnja.

Dan sebagian ada djoega orang anggеп hidoeppnja tida mempoenjai kapentingan apa-apa, sebab hidoeppnja tida kekel, dan ada saoepama bebrapa ika njang hidoeppnja „a e r - e m p a n g,“ dan di sitoe ia tjoemah menanti tempo boeat orang dateng memantjing; hal mana goena orang jang masih kewrang pikir, djadi dapet rasa djerih boeat menoenggoe datengnja itoe sa'at dengen hati berdebar-debar, beserta lantas dalem pikirannja djadi membalik merasa tida mempoenjai kagoena'an atas hidoeppnja, jang marika anggеп soedah tida berbeda seroepa acteur jang pada mainken rolnja diatasnja panggoeng komèdie.

Maka orang djangan sampe kliroe djalan di dalem penghidoepan, sebab di sitoe soenggoe terlaloe banjak djalan simpangan jang gampang boeat membawa diri kita kesasar. Seperti Nabi Khong Tjoe ada menoedjarken: „Tik ki sian tjia, dji tjióng tji. Ki poet sian tjia, dji kay tji,“ atawa: „Pilihlah jang baek boeat ditoeroet, sedeng jang salah haroes dirobah.“

Spreker menoegoeken ini oedjar dari orang jang telah soetji, boeat sama-sama pada diketaoein dan jang ada salah toedjoean, sebab didalem ini djeman ada banjak orang sabagi diri jang bitjara diatas ini podium, pande mendjoeal omong fatsal ilmoe-ke-oetama'an, aken tetapi tjoemah omongan sadja. Dan sajang boekannja soeatoe . . . . . Be o, tjoba begitoe tentoe bisa mendapet harga jang bagoes.

Begitoelah menoeroet pendapatan spreker, segala

apa jang terselip dalem kahidoepan kita ini waktoe,  
masih banjak sekalih jang moesti lantas diperbaekin.  
Lantaran ini maka spreker bertoeroet girang jang  
sekarang disini (Tempeh) bisa ada ini gerakan jang  
aken mengasih pimpinan kepada sesamanja ka dalem  
golongan kasoetjian, jaitoe boeat menoedjoe pada  
kaslametan oemoem, agar hidoept kita bisa mendjalank  
itoe kawadjiban dengen satoeloesnja, dan  
satjara ichlas lahir dan batin djangan ada berbedaan  
lakoe. Sebab kaloe orang ingin mendapatkan ka  
slametan dari doenia hingga acherat, lebih doeloe  
orang koedoe ngelaraskeni „lahir-batinja,” baroe  
bisa trentrem hidoeptna goena menjapei kesoetjian.

Maka aken dapat itoe *tiga sifat ilmoe* kahidoepan,  
kita moesti menggoenaken kita poenja „Sam Kauw“  
jang berada didalem kita (orang), sebagi: *TIE DJIN*  
*JONG*. *Tie*, ketjerdikan, (atawa banjak pengataoean)  
*Djin*, welas-asih (atawa adil pada sesamanja). *Jong*,  
gaga (brani), atawa gaga melawan segala jang tida  
baek, dan brani melakoeken apa jang bener.

Sampe disini spreker merasa soedah tjoekoep  
boeat mengoetarakken rasa hati, dan sebagi penoetoep-  
nya berikoet spreker poenja slamet-malem dan slamet  
bertemoean dalem ini perkoempoelan laen kalihnj.

---

### ITOE BIBIT „DJIEN” ATAWA KAWELASAN.

*Lezing dari Mej. Sie Lian Kwie dalem pertemoean  
dari Sam Kauw Hwe Tempeh tanggal 25-7-'36.*

Soedara-soedara pendenger jang terhormat! Kapan  
mata hari soedah silem, terganti dengen sang malem,  
saja seperti tersedar sebagi satoe impian zonder lela-  
kon. Tapi itoe kita orang tida taoe, saja baroesan  
pada siapa? Saban-saban saja rasaken hati, doenia  
ini ada kosong. Tapi sabentar penoeh kombali, tida

Iain manoesia sendiri jang membawa lelakon, seperti goenoeng jang tida gampang terkiser, tapi kekoeatan alam roepanja ada lebih besar dari manoesia. Sebagi kita jang lagi terkena langgar apa-apa, kita poenja pikiran dan hati soedah tida karoean rasanja, kita ingin soepaja boeat itoe bisa lantas dapetken kapastian, tapi sebagimana terjadi sia-sia sadja. Kenapa begitoe? Rasa koeatir, djengkel, saling oeber-oeberan dalem kita poenja otak, hingga maski kita soedah tjoba sabisanja aken singkirken, itoe berkelaiyan di antara kita poenja „perasahan“ dan „kekoeatiran“ soepaja bisa teroes tinggal anteng, kaloe kita bajangkan sama itoe kedjadian sekarang. Rasanja kita kepingin salekasnia bisa mati, tapi roepanja Toehan masih tida maoe panggil kita poelang. Ia maoe kita alamken lebih banjak kesangsara'an sakean kalih. Tapi kita tida oesah koeatirin, asal perdoeli batin kebaekan kaloe sampe dateng brenti di fihak kabaekan jang oetama itoe kita orang sama alam toenggal djadi satoe Priboedi kabatinan jang paling oetama asal dari firman Toehan, teroes menoenggal pada hatinja manoesia.

Satoe pokok pelajaran Nabi Khong Hoe Tjoe, segala matjem kedjadian hidoepr dari sini, mati dari sini.

Sebab firman Toehan toeroen di badan kita orang masing-masing djadi terbilang : Thian Beng, kerna disitoe ada bibit „*Djen*“ pri kamanoesia'an.

Sampe di sini sadja ini pembitjara'an, dan kita ha-toerken banjak trima kasih pada soedara-soedara pendenger sekalian.

---

## Kabaran ringkes tentang Pergerakan Sam Kauw.

SAM KAUW HWE TELOKBETONG. Ini pakempoelan, pada tanggal 3 Juli jang laloe, telah adaken Algemeene Combinatie Vergadering dari pakempoelan-pakempoelan Tionghoa di Telokbetong dalem krenteng Thay Hien Bio. Antara jang hadlir salaennja Bestuur Sam Kauw Hwe salengkepnja, ada djoega toeantoean :

Thio Boen Siat dan Tan Koei Kim, wakil dari Verg. Hoo Hap.

Lim San Goan dan The Tjoan Liat, wakil dari Verg. S. M. A. T. H.

Lim Eng Soe, wakil dari Verg. Soe Po Sah.

Lim Kek Kie, wakil dari Verg. Sin Seng Hoat.

Ang Tiauw Bie, wakil dari Verg. Thung Siang Kong Hwee.

Lauw Sen Sen, wakil dari Verg. Gian Koe Sia.

Tjioe Tiam Ling, wakil dari Verg. Hok Kian Hwee Koan.

Salaennja dari itoe ada hadlir djoega Toeantoe Lim Giok Keng jang diondang speciaal boeat hadlirin itoe vergadering, jang sama sekali ada dikoendjoengin oleh ampat poeloeh orang lebih.

Djam 9 malem vergadering diboeka oleh President Sam Kauw Hwe, Toeantoe Lim Ham Tjeng, jang hatoerken slamet dateng, enz. komoedian disamboeng oleh Toeantoe Oeij Sien Hie, jang menerangken kafaedahannja Sam Kauw Hwe boeat pendidikan batin, dan komoedian memberi taoe jang Sam Kauw Hwe Telokbetong soedah berdiri ampir satoe taon dengan bekerja dalem kalangan ketjil. Soepaja bisa diadaken organisatie jang lebih baek maka dibikin ini combinatie vergadering boeat minta wakil-wakil poenja pertimbangan, bagimana haroes di-ichtiarken soepaja Sam Kauw Hwe djadi leb h madjoe dan peladjaran Sam Kauw lebih tersiar.

Toean Lim Giok Keng memberi pikiran, sabagi pemboeka djalan, teroetama haroes dimadjoeken propaganda sabagi penerangan, dan ini bisa d-djalanken dengen menjiarken orgaan *Seng Too Gwat Po*, tentang mana haroes dapat toendjangan financien soepaja tida mogok satengah djalan boeat membajar ongkos pertjitanan dan sabaginja. Maka pada sekalian wakil-wakil jang berhadlir diminta pertimbangan, apa kiranya setoedjoe djikaloe, boeat menoendjang pada Sam Kauw Hwe, diminta bantoean dari kasnya krenteng Thay Hien Bio.

Oleh sekalian jang hadlir lantes dinjataken setoedjoe, lantaran menginget toedjoean dari Sam Kauw Hwe ada boeat menjiarken kabatinan, hingga ada tjotjok boeat Thay Hien Bio, maka ada dengen sapantesnya djikaloe kahatsilan dari itoe krenteng dibagiken pada Sam Kauw Hwe. Tapi dari sebab tida ada satoe bestuur dari Thay Hien Bio jang dateng berhadlir maski soedah dikirim ondangan speciaal, maka boeat dapetken kapastian, oleh Sam Kauw Hwe nanti dimadjoeken satoe soerat aken bertaoekan ini poetesan dan minta itoe toendjangan.

Komoedian Toean Lim Giok Keng minta soepaja kapan itoe soaal soedah djadi beres, Sam Kauw Hwe adaken speciaal propagandist lelaki dan pram-poean dengen diberi gadji boeat koendjoengin roemah-roemah pendoedoek Tionghoa di Telokbetong soepaja bisa menerangkan lebih djelas hal Sam Kauw dan toedjoeannja.

Toean Ang Tiauw Bie menjataken pikiran bahoea ada pantas kaloe Sam Kauw Hwe dapat toendjangan djoega dari Thung Siang Kong Hwe jang kasnya terkenal koeat, dan biasa menoendjang pada T.H.H.K. Telokbetong dan Peng Min School Tandjongkarang. Maka Toean Ang berdjandji maoe voorstel pada bestuur T.S.K.H.

soepaja beriken djoega sedikit soembangan oentoek S. K. H.

Toean Lim San Goan poen foeroet menjataken pikiran tentang bagimana perloenza orang Tionghoa korek dan preksa soember-soember pengataoean, soepaja mengarti betoel agamanja sendiri, djangan tjomah anoet-bioeng zonder taoe apa maksoed dan bagimana djoentroengannja. Toean Lim San Goan menjataken setoedjoe pada pikiran dari Toean Lim Giok Keng boeat minta toendjangan pada kasnya Thay Hien Bio, tetapi sabagitoe djaoe jang Toean Lim San Goan inget, belon perna Bestuur Thay Hien Bio bikin verslag dari ka'ada'an oewangnja itoe roemali klen teng, dan tida kataoean betoel siapa jang menjadi pengeroes dan kashouder.

Toean-toean Thio Boen Siat, Tan Koei Kim dan Ujoe Tiam Ling djoega telah bitjara aken menjataken sympathie pada ini gerakan, dan setoedjoe pada apa jang divoorstel. Komoedian dengen menoeroet soeara jang terbanjak, toean Lim Giok Keng telah diangkat menjadi beschermkeer dari Sam Kauw Hwe.

Vergadering ditoeeloep djam 11,45.

BATAVIA BUDDHIST ASSOCIATION dan SAM KAUW HWE BATAVIA. Di bawah ini ada tjetetan dari lezing-lezing jang dibikir paling blakang di Klen teng Kwan Im Tong, Batavia :

9 Juli. M. Soetardjo : Soal tida makan daging.

16 " Kwee Tek Hoaij : Bebrapa keterangan tentang Hauw.

23 " Kadiroen Mangoenpoernomo : Keterangan lebih djelas soal tida makan daging.

30 " Kwee Tek Hoaij : Mentjari katentreman hidoe (samboengan).

6 Aug. R. Soekirlan: Apa jang dibilang "Mati."

Han Hok Khiam : Oedjar-oedjar jang berhoeboeng dengen Hauw.

BAROE TERBIT

SOEDAH SEDIA

Penghidoepan  
Bhagawan Sariputra  
(Loo-han Sia Lie Tjoe)

Oleh  
BHIKKHU NARADA

Dimelajoeker  
oleh  
KWEB TEK HOAD.

Bhagawan Saripoetra (Sia Lie Tjoe) ada Buddha poenja moerid jang No. 1 etawa paling tinggi, dan terkenal sabagi satoe sastrawan jang sanget bijaksana. Dalem ini boekoe ada ditoetoerken penghidoepannja dalem tempo jang laloe dan jang paling blakang sabagi moerid dari Buddha, pakerdja'annja kialkoeannja, moerid-moeridnja, dan sampe pada wafatnja.

Ini boekoe haroes diamponerai oleh sasoeator orang jang hendak fahamken Buddhism.

Harga per djiwid tjoemah f 0,30.

Abonne ini maandblad traoesah kirim oewang bi moeka.

BOEKHANDEL „MOESTIKA.”  
Tjitjoeroeg.

*Typ. Drukkerij Moestika, Tjitjoeroeg.*